



本紀第九

金史九

開府儀同三司上柱國錄軍國軍事前中書右丞相監修

國史領經筵事都總裁臣脫脫奉

勅修

章宗一

章宗憲天光運仁文義武神聖英孝皇帝諱璟小字麻達
葛顯宗嫡子也母曰孝懿皇后徒單氏大定八年世宗幸
金蓮川秋七月丙戌次冰井上生翌日世宗幸東宮宴飲
歡甚語顯宗曰祖宗積慶而有今日社稷之福也又謂司
徒李石樞密使紇石烈志寧等曰朕子雖多皇后止有太
子一人幸見嫡孫又生於麻達葛山朕嘗喜其地衍而氣

清其以山名之群臣皆稱萬歲十八年封金源郡王始習
本朝語言小字及漢字經書以進士完顏匡司經徐孝美
等侍讀二十四年世宗東巡顯宗守國上奉表詣上京問
安仍請車駕還都世宗嘉其意賜勅書答諭二十五年三
月萬春節復奉表朝賀六月顯宗崩世宗遣滕王府長史
臺御院通進臺來護視十二月進封原王判大興府事入
以國語謝世宗喜且爲之感動謂宰臣曰朕嘗命諸王習
本朝語惟原王語甚習朕甚嘉之諭旨曰朕固知汝年幼
服制中未可付以職然政事亦須學京輦之任姑試爾才
其勉之二十六年四月詔賜名璟五月拜尚書右丞相世

宗謂曰宮中有輿地圖觀之可以具知天下遠近阨塞又
謂宰臣曰朕所以置原王於近輔者欲令親見朝廷議論
習知政事之體故也十一月詔立爲皇太孫稱謝於慶和
殿世宗諭之曰爾年尚幼以明德皇后嫡孫惟汝一人試
之以事甚有可學之資朕從正立汝爲皇太孫建立在朕
保守在汝宜行正養德勿近邪佞事朕必盡忠孝無失衆
望則惟汝嘉二十七年三月世宗御大安殿授皇太孫冊
赦中外丁巳謁謝太廟及山陵始受百官歲賀二十八年
十二月乙亥世宗不豫詔攝政聽授五品以下官丁亥受
攝政之寶二十九年春正月癸巳世宗崩即皇帝位于柩

前丙申詔中外賜內外官覃恩兩重三品已上者一重免
今歲租稅并自來懸欠係官等錢鰥寡孤獨人絹一匹米
兩石已亥遷大行皇帝梓宮于大安殿祭卯以皇太后命
爲令旨甲辰以大理卿王元德等報哀于宗高麗夏乙卯
白虹貫日亘天丁巳參知政事崇浩罷山東統軍喬以私
過都城不赴哭臨咎五十降授彰化軍節度使戊午名皇
太后宮曰仁壽設衛尉等官二月辛酉朔日有食之癸亥
始聽政追尊皇考爲皇帝尊母爲皇太后甲子命學士院
進呈漢唐便民事及當今急務乙丑白虹亘天初登聞鼓
院所以達冤枉舊嘗鎖戶其令開之戊辰更仁壽宮名隆

慶詔宮籍監戶舊係睿宗及大行皇帝皇考之奴婢者悉
放爲良己巳勅御史臺自今監察令本臺辟舉任內不稱
職亦從奏罷丁丑增定百官俸乙酉詔有司稽考典故許
引用宗事是月宋主內禪子惇嗣立三月壬辰朝于隆慶
宮是月凡五朝己酉詔以生辰爲天壽節癸丑夏國遣使
來吊夏四月己巳夏國遣使來祭辛未宋遣使來吊祭乙
酉葬世宗光天興運文德武功聖明仁孝皇帝於興陵戊
子朝于隆慶宮五月庚寅朔太白晝見壬寅宋主遣使來
報嗣位夏國遣使來賀即位丙午以柎廟禮成大赦丁未
地生白毛庚戌詔罷送宣錢今後諸護衛考滿賜官錢二

千貫壬子勅收錄功臣子孫量材於局分承應戊午朝于
隆慶宮以東北路招討使溫迪罕速可等為賀宋主即位
使河溢曹州閏月庚申朔封兄珣為豐王琮鄆王瓌瀛王
從彛沂王弟從憲壽王玠溫王辛酉制諸飢民賣身已贖
放為良復與奴生男女並聽為良丙寅觀稼于近郊庚午
以樞密副使唐括貢為御史大夫壬申封乳母孫氏蕭國
夫人姚氏莘國夫人丙子進封趙王永中漢王曹王永功
冀王幽王永成具王虞王永升隨王徐王永蹈衛王滕王
永濟潞王薛王永德潘王庚辰宋遣使來賀即位癸未朝
于隆慶宮詔學士院自今誥詞並用四六乙酉詔諸有出

身承應人係將來受親民之職可命所屬諭使為學其護
衛符寶奉御奉職侍直近密當選有德行學問之人為之
教授六月己丑朔有司言律科舉人止知讀律不知教化
之原必使通治論語孟子涵養器度遇府會試委經義試
官出題別試與本科通定去留為宜從之詔有司請親王
到任各給錢二十萬辛卯脩起居注完顏烏者知登聞檢
院孫鐸皆上書諫罷圍獵上納其言拾遺馬升上儉德箴
乙未初置提刑司分按九路並兼勸農採訪事屯田鎮防
諸軍皆屬焉丁酉幸慶壽寺作瀘溝石橋己亥朝于隆慶
宮甲辰罷送赦禮物錢朝于隆慶宮乙卯高麗國王皓遣

使來弔祭及會葬勅有司移報宋高麗夏天壽節於九月
一日來賀丁巳命提刑官除後於便殿聽旨每十月使副
內一貢入見議事如止一貢則令判官入見其判官所掌
煩劇可升同隨朝職任秋七月辛酉減民地稅十之一河
東南北路十之二下田十之三甲子朝于隆慶宮乙丑勅
近侍官授外任三品四品賜金帶一重幣有差丁卯以太
尉尚書令東平郡王徒單克寧為太傅改封金源郡王辛
未高麗遣使來賀即位甲戌奉皇太后幸壽安宮辛巳詔
京府節鎮防禦州設學養士初設經童科御史大夫唐括
貢罷禮部尚書移刺履為參知政事以刑部尚書完顏守

貞等為賀宋生日使八月戊子朔奉皇太后幸壽安宮辛
卯勅有司京府州鎮設學校處其長貳幕職內各以進士
官提控其事仍具八街壬辰初定品官子孫試補令史格
及提刑司所掌三十二條左司諫郭安民上疏論三事曰
崇節儉去嗜欲廣學問丁酉如大房山戊戌謁奠諸陵己
亥還都庚子朝于隆慶宮是月凡三朝壬寅制提刑司設
女直契丹漢兒知法各一人甲辰參知政事劉瑋罷丙辰
宋高麗夏遣使來賀天壽節九月戊午朔天壽節以世宗
喪不受朝庚申詔增守山陵為二十丁給地十頃壬戌詔
罷告捕亂言人賞甲子制諸盜賊聚集至十人或騎五人

以上所屬移捕盜官捕之仍逆言省部三十人以上聞奏
違者杖百是日朝于隆慶宮是月凡四朝丁卯制強族大
姓不得與所屬官吏交徃違者有罪戊辰以隆慶宮衛尉
把思忠爲夏國生日使庚午以尚輦局使崇德爲橫賜高
麗使丙子獵于近郊戊寅監察御史焦旭劾奏太傅克寧
右丞相襄不應請車駕田獵上曰此小事不須治之乙酉
如大房山冬十月丁亥朔謁莫諸陵己丑還都庚寅朝于
隆慶宮是月凡四朝辛卯上顧謂宰臣曰翰林闕人平章
政事汝霖對曰鳳翔治中郝俱可汝霖諫止田獵詔荅曰
卿能每事如此朕復何憂然時異事殊得中爲當丙申冬

獵己亥次羅山庚子次玉田辛丑沁州丹州進嘉禾丁未
次寶坻庚戌中侍石抹阿古誤帶刀入禁門罪應死詔杖
八十癸丑至自寶坻十一月己未朝于隆慶宮辛酉以右
宣徽院使裴滿餘慶等爲賀宗正旦使癸亥上謂宰臣曰
今之用人太拘資歷循資之法起於唐代如此何以得人
平章政事汝霖對曰不拘資格所以待非常之材上曰崔
祐甫爲相未踰年薦八百人豈皆非常之材歟甲子諭尚
書省曰太傅年高每趨朝而又赴省恐不易自今旬休外
四日一居休庶得調攝常事他相理問惟大事白之可也
戊辰諭尚書省自今五品以上官各舉所知歲限所舉之數

如不舉者坐以蔽賢之罪仍依唐制內五品以上官到任即舉自代並從提刑司採訪之已巳初制轉述文字法士申朝于隆慶宮乙亥命參知政事移刺履提控刊脩遼史丁丑以西上閣門使移刺邴爲高麗生日使御史臺奏故事臺官不得與人相見蓋爲親王宰執形勢之家恐有私徇然無以訪知民間利病官吏善惡詔自今許與四品以下官相見三品以上如故辛巳詔有司今後諸處或有饑饉令總管節度使或提刑司先行賑貸或賑濟然後言上十二月丙戌朔朝于隆慶宮是月凡五朝詔罷鑄錢丁亥密州進白雉壬辰諭有司女直人及百姓不得用網捕野

物及不得放群鷗枉害物命亦恐女直人廢射也戊戌復置北京遼東鹽使司仍罷巡鹽使以河東南北路提刑司言賑寧化保德嵐州饑其流移復業給復一年是日禁宮中上直官及承應人毋得飲酒乙巳祭奠興陵壬子諭臺臣曰提刑司所舉劾多小過行則失大體不行則恐有所沮其以此意諭之甲寅宋高麗夏遣使來賀正旦是冬無雪

明昌元年春正月丙辰朔改元以世宗喪不受朝賀上朝于隆慶宮是月凡四朝丁巳制諸王任外路者許游獵五日過此禁之仍令戒約人從毋擾民辛酉諭尚書省宰執

所以總持國家不得受人餽遺或遇生辰受所獻毋過萬錢若總大功以上親及二品以上官不禁壬戌以知河中府事王蔚爲尚書右丞刑部尚書完顏守貞爲參知政事甲子如大房山乙丑奠謁興陵裕陵丙寅還都戊辰制禁自披剃爲僧道者勅外路求世宗御書辛未如近畿春水巳卯如春水二月丁亥太白晝見丙申遣諭諸王凡出獵毋越本境壬寅諭有司寒食給假五日著于令甲辰至自春水朝于隆慶宮是月凡四朝癸丑地生白毛甲寅如大房山三月乙卯朔謁奠興陵丙辰還都朝于隆慶宮是月凡六朝巳未勅點檢司諸試護衛人湏身形及格若功臣子

孫善射出衆雖不及格亦令入見癸亥禮官言民或一產三男內有才行可用者可令察舉量材叙用其驅婢所生舊制官給錢百貫以資乳哺尚書省請更給錢四十貫贖以爲良制可丙寅有司言舊制朝官六品以下從人輸庸者聽五品以上不許輸庸恐傷禮體其有官職俱至三品年六十以上致仕者人力給半乞不分內外願令輸庸者聽從之巳巳擊毬於西苑百寮會觀癸酉詔內外五品以上歲舉廉能官一員不舉者坐蔽賢罪乙亥初設應制及宏詞科丁丑制內外官并諸局承應人遇祖父母父母忌日並給假一日辛巳詔修曲阜孔子廟學壬午如壽安宮

夏四月甲申朔朝于隆慶宮是月凡四朝戊戌如壽安宮
五月不雨乙卯祈于北郊及太廟朝于隆慶宮是月凡三
朝丙辰以鷹坊使移刺寧為橫賜夏國使戊午拜天于西
苑射柳擊毬縱百姓觀壬戌祈雨于社稷甲子制省元及
四舉終場人許該恩己巳復祈雨于太廟庚午置知登聞
鼓院事一人丙子以祈雨望祭嶽鎮海瀆于北郊戊寅命
內外官五品以上任內舉所知才能官一員以自代壬午
以參知政事移刺履為尚書右丞御史中丞徒單鑑為參
知政事尚書右丞相襄罷六月己丑制定親王家人有犯
六長史府掾失覺察故縱罪壬辰奉皇太后幸慶壽寺甲

辰勅僧道三年一試秋七月己巳以禮部尚書王脩等為
賀宋生日使庚午朝于隆慶宮丁丑詔罷西北路蝦蟆山
市場八月癸未朔禁指託親王公主奴隸占網船侵商旅
及妄徵錢債乙酉詔設常平倉丁亥至自壽安宮戊子朝
于隆慶宮是月凡三朝己丑以判大睦親府事宗寧為平
章政事壬辰幸玉泉山即日還宮癸巳罷諸府鎮流泉務
選才幹之官為諸州刺史皆召見諭戒之戊戌上諭宰臣
曰何以使民棄末而務本以廣儲蓄令集百官議戶部尚
書鄧儼等曰今風俗侈靡宜定制度辨上下使服用居室
各有差等抑昏喪過度之禮禁追逐無名之費用度有節

蓄積自廣矣右丞履參知政事守貞鑑曰凡人之情見美則願若不節以制度將見奢侈無極費用過多民之貧乏殆由此致方今承平之際正宜講究此事為經久法上是履議壬寅勅麻吉以皇家袒免之親特收充尚書省祗候郎君仍為永制丁未獵于近郊己酉宋高麗夏遣使來賀天壽節九月壬子朔天壽節以世宗喪不受朝丙辰以廉能進擢北海縣令張翺等十八人官己未以武衛軍副都指揮使烏林荅謀甲為夏國生日使庚申朝于隆慶宮壬戌如秋山冬十月丁亥至自秋山戊子朝于隆慶宮丙申詔賜貴德州孝子翟巽遂州節婦張氏各絹十匹粟二十

石戊戌以有司言登聞鼓院同記注院勿有所隸制民庶聘財為三等上百貫次五十貫次二十貫丁未獵于近郊十一月乙卯朝于隆慶宮是月凡五朝以惑眾亂民禁罷全真及五行毗盧以僉書樞密院事把德固等為賀宋正旦使丁巳制諸職官讓蔭兄弟子姪者從其所請戊辰召禮部尚書王脩諫議大夫張暉詣殿門諭之曰朝廷可行之事汝諫官禮官即當辯析小民之言有可採者朕尚從之况卿等乎自今所議毋但附合於尚書省辛未以西上閣門使移刺撻不也為高麗生日使丙子冬獵己卯次雄州判真定府事吳王永成判定武軍節度使隋王永升來

朝十二月壬午免獵地今年秋丁亥次饒陽己丑平章政
事張汝霖薨丁酉至自饒陽甲辰幸太傅徒單克寧第視
疾以克寧為太師尚書令封淄王賜銀千五百兩絹二千
匹乙巳朝于隆慶宮丙午詔有司正旦可先賀隆慶宮然
後進酒丁未宋高麗夏遣使來賀正旦

二年春正月庚戌朔以世宗喪不受朝癸丑諭有司夏國
使可令館內貿易一日尚書省言故事許貿易三日從之
甲寅始許宮中稱聖主乙卯皇太后不豫自是日往侍疾
丙夜乃還辛酉皇太后崩丙寅以左副都點檢尙等報哀
于宋高麗夏庚午太師尚書令淄王徒單克寧薨甲戌百

官表請聽政不許戊寅詔賜陔括里部羊三萬口重幣五
百端絹二千匹以振其乏吳王永成隋王永升以聞國喪
奔赴失期罰其俸一月其長史笞五十己卯有司言漢王
永中以疾失期上諭使回二月壬午百官復請聽政不許
壬辰上始視朝勅親王及三品官之家毋許僧尼道士出
入諭有司進士程文但合格者即取之母限人數丙申以
樞密副使夾谷清臣為尚書左丞戊戌更定奴誘良人法
丙午初設王傅府尉官三月丁巳夏國遣使來弔祭亥勅
有司國號犯漢遼唐宋等名不得封臣下有司議以遼為
恒宗為汴秦為鐫晉為并漢為益梁為郅齊為彭殷為譙

唐為絳吳為鄆蜀為夔陳為宛隋為涇虞為澤制可丁卯
夏國遣使來祭乙亥高麗遣使來吊祭丁丑宋遣使來吊
祭四月戊寅朔尚書省言齊民與屯田戶徃徃不睦若令
通相婚姻實國家長久安寧之計從之乙酉葬孝懿皇太
后于裕陵戊子制諸部內災傷主司應言而不言及妄言
者杖七十檢視不以實者罪如之因而有傷人命者以違
制論致枉有徵免者坐贓論妄告者戶長坐詐不以實罪
計贓重從詐匿不輸法庚寅禁民庶不得服純黃銀褐色
婦人勿禁著為永制辛卯上幸壽安宮諫議大夫張暉等
上疏請止其行不允癸巳諭有司自今女直字直譯為漢

字國史院專寫契丹字者罷之甲午改封永中為井王永
功為魯王永成亮王永升曹王永蹈鄭王永濟韓王永德
誦王戊戌增太學博士助教員己亥學士院新進唐杜甫
韓愈劉禹錫杜牧賈島王建宋王禹偁歐陽脩王安石蘇
軾張耒秦觀等集二十六部庚子改壽安宮名萬寧壬寅
如萬寧宮詔襲封衍聖公孔元措視四品秩五月庚戌勅
自今四日一奏事仍免朝戊辰詔諸郡邑文宣王廟風雨
師社稷神壇隳廢者復之詔御史臺令史並以終場舉人
充六月戊子平章政事宗寧薨癸巳禁稱本朝人及本朝
言語為蕃違者杖之丙午尚書右丞移刺履薨秋七月丁

已以參知政事徒單鎰為尚書右丞御史中丞夾谷衡為
參知政事己未觀稼于近郊己巳禁職官元日生辰受所
屬獻遺仍為永制以同僉大睦親府事堯等為賀宗生日
使庚午諭有司自今外路公主應赴關其駙馬都尉非奉
旨毋擅離職八月癸未至自萬寧宮己亥勅山東河北關
食等處許納粟補官諭有司自今親王所領如有軍處令
佐貳總押軍事乙巳宗高麗夏遣使來賀天壽節九月丁
未朔天壽節以皇太后喪不受朝甲寅如大房山乙卯謁
真裕陵丙辰還都丁巳以西上閣門使白琬為夏國生日
使己未定詐為制書未施行制以尚書左丞夾谷清臣為

平章政事封芮國公參知政事完顏守貞為尚書左丞知
大興府事張萬公為參知政事庚申如秋山冬十月己丑
至自秋山甲午勅司獄毋得與府州司縣官筵宴還往
違者罪之禁以太一混元受籙私建庵室者壬寅以河北
山東旱應雜犯及強盜己未發覺減死一等釋徒以下十
一月丙午朔制諸女直人不得以姓氏譯為漢字甲寅禁
伶人不得以歷代帝王為戲及稱萬歲犯者以不應為事
重法科丁巳以幽王傅宗璧等為賀宗正旦使戊午夏人
殺我邊將阿魯帶甲子制投匿名書者徒四年丙寅以近侍
局副使完顏匡為高麗生日使壬申勅提刑司官自今每

十五日一朝十二月乙亥朔勅三品致仕官所得僦從母
令輸庸已卯定鎮邊守將致盜賊罪甲申獵于近郊乙酉
詔罷契丹字已丑尚書右丞徒單鑑罷癸卯宋高麗夏遣
使來賀正旦

三年春正月乙巳朔以皇太后喪不受朝丙辰以孝懿皇
后小祥尚書省請依明昌元年世宗忌辰例諸王陪位服
慘紫去金玉之飾百官不視事禁音樂屠宰從之壬戌如
春水二月甲戌朔勅猛安謀克許於冬月率所屬戶畋獵
二次每出不得過十日壬辰至自春水丁酉獵于近郊辛
丑詔追復田穀等官爵閏月甲子以山東路統軍使烏林

答愿為御史大夫三月乙亥更定強盜徵贓品官及諸人
親獲強盜官賞制辛巳初設左右衛副將軍癸未瀘溝石
橋成辛熙春園丁亥如萬寧宮辛卯詔賜棣州孝子劉瑜
錦州孝子劉慶祐綰粟旌其門閭復其身上因問宰臣曰
從來孝義之人曾官使者幾何左丞守貞對曰世宗時有
劉政者嘗官之然若輩多溥質亦及事上曰豈必盡然孝
義之人素行已備稍可用即當用之後雖有希覬作偽者
然偽為孝義猶不失為善可檢勘前後所申孝義之人如
有可用者可具以聞癸巳尚書省奏言事者謂釋道之流
不拜父母親屬敗壞風俗莫此為甚禮官言唐開元二年

勅云聞道士女冠僧尼不拜二親是為子而忘其生傲親而徇於末自今以後並聽拜父母其有喪紀輕重及尊屬禮數一准常儀臣等以為宜依典故行之制可左丞守貞言上嘗命臣問忻州陳毅上書所言事其一極論守令之弊臣面問所以救之之道竟不能言上曰方今政欲知其弊也彼雖無救弊之術但能言其弊亦足嘉矣如毅言及隨處有司不能奉行條制為人傭雇尚須出力况食國家祿而乃如是得無虧臣子之行乎其令檢會前後所降條理舉行之是日溫王玠薨丁酉命有司祈雨望祀嶽鎮海瀆于北郊四月壬寅朔定宣聖廟春秋釋奠三獻官以祭

酒司業博士充祝詞稱皇帝謹遣及登歌改用太常樂三其獻官并執事與享者並法服陪位學官公服學生儒服尚書省奏提刑司察舉涿州進士劉器博博州進士張安行河中府胡光謙光謙年雖八十三尚可任用勅劉器博張安行特賜同進士出身胡光謙召赴闕甲辰祈雨于社稷丙午罷天山北界外採銅戊申瀛王瓌薨戊午詔集百官議北邊開壕事詔賜雲內孝子孟興絹十匹粟二十石賜同州貞婦師氏謚曰節丙寅以旱灾下詔責躬丁卯復以祈雨望祀嶽鎮海瀆山川于北郊戊辰勅親王衣領用銀褐紫緣遣御史中丞吳鼎樞等審決中都冤獄外路委提

刑司處決左丞守貞以旱上表乞解職不允參知政事衡萬公皆入謝上曰前詔所謂罷不急之後省無名之費議冗官決滯獄四事其速行之五月壬申朔以尚書禮部員外郎李朮魯子元為橫賜高麗使祭酉罷北邊開墾之後甲戌祈雨于社稷是日雨戊寅出宮女百八十三人尚書省奏近以山東河北之饑已委宣差所至安撫賑濟復遣右三部司正范文淵往視之乙酉以雨足致祭于社稷戊子百官賀雨足尚書左丞完顏守貞罷己丑以雨足望祀嶽鎮海瀆六月癸卯宰臣請罷提刑司上曰諸路提刑司官止三十餘員猶患不得其人州郡三百餘處其能盡得

人乎弗許甲寅以久雨命有司祈晴丁巳定提刑司條制辛酉詔定內外所司公事故作疑申呈罪罰格乙丑以知大名府事劉瑋為尚書右丞有司言河州災傷民乏食而租稅有未輸詔免之諭戶部可預給百官冬季俸令就倉以時直糶與貧民秋成各以其賞糶之其所得必多矣而上下便之其承應人不願者聽秋七月戊寅勅尚書省曰饑民如至遼東恐難遽得食必有饑死者其令散糧官問其所欲居止給以文書命隨處官長計口分散令富者出粟養之限以兩月其粟充秋稅之數己卯祁州刺史頓長壽安武軍節度副使胡刺坐賑濟不及四縣各杖五十癸

未詔增北邊軍千二百人分置諸堡丁亥胡光謙至闕命
學士院以雜文試之稱旨上曰朕欲親問之辛卯以殿前
都點檢僕散端等為賀宋生日使己亥上謂宰臣曰聞諸
王傳尉多苛細舉動拘防亦非朕意是職之設本欲輔導
諸王使歸之正得其大體乙平章政事清臣曰請以聖
意徧行之曰已諭之矣八月癸卯勅諸職官老病不肯辭
避有司諭使休閑者不在給俸之列格前勿論上以軍民
不和吏貪姦弊詔四品以下六品以上集議于尚書省各
述所見以聞甲辰集三品以下六品以上官問以朝政得
失及民間利害令各書所對丁未以有司奏寧海州文登

縣王震孝行以嘗業進士并試其文特賜同進士出身仍
注教授一等職任辛亥至自萬寧宮特賜胡光謙明昌二
年進士第三甲及第授將仕郎太常寺奉禮郎官制舊設
是職未嘗除人以光謙德行才能故特授之己未以烏林
荅慮為尚書左丞辛酉獵于近郊乙丑上謂宰臣曰朕欲
任官令久於其事若今日作禮官明日司錢穀雖間有異
材然事能悉辦者鮮矣對曰使中材之人久於其職事既
熟終亦得力上問太常卿張暉古有三恪今何無之暉具
典故以聞丁卯宋高麗遣使來賀天壽節九月庚午朔
天壽節以皇太后喪不受朝諭尚書省去歲山東河北被

災傷處所閣租稅及借貸錢粟若便徵之恐負民未蘇俟
豐收日以分數帶徵可也又諭宰臣曰隨路提刑司舊止
察老病不任職及不堪親民者如得其實即改除他路若
他路提刑司覆察得實勿復注親民之職卿等其議行之
甲戌以郊社署令唐括合達為夏國生日使己卯如秋山
免圍場經過人戶今歲夏秋租稅之半曾當差後者復一
年冬十月壬寅至自秋山丙午勅御史臺提刑司自今保
申廉能官勿復有乞升品語壬子有司奏增修曲阜宣聖
廟畢勅党懷英撰碑文朕將親行釋奠之禮其檢討典故
以聞甲寅勅置常平倉處並令州府官以本職提舉縣官

兼管旬其事以所糴多寡約量升降以為永制賜河南路
提刑司所舉逸民游總同進士出身以年老不樂仕進特
登仕郎給正八品半俸終身戊午諭尚書省訪求博物多
知之亡筮亥遣諭諸王府傅尉曰朕分命諸王出鎮蓋欲
政事之暇安便優逸有以自適耳然慮其舉措之間或違
於理所以分置傅尉使勸導彌縫不入於過失而已若公
餘遊宴不至過度亦復何害今聞爾等或用意太過凡王
門細碎之事無妨公道者一一干與贊助之道豈當如是
宜各思職分事舉其中無失禮體仍就諭諸王使知朕意
丙寅勅應保舉官及試中書判者委官覆察言行相副者

量與陞除隨朝及六品以上各隨所長用之己巳獵于近郊十一月庚午朔尚書省奏翰林侍講學士党懷英舉孔子四十八代孫端甫年德俱高該通古學濟南府舉魏汝翼有文章德誼苦學三十餘年已四舉終場蔚州舉劉震亨學行俱優嘗充舉首益都府舉王樞博學善書事親至孝勅魏汝翼特賜進士及第劉震亨等同進士出身並附王澤榜孔端甫俟春暖召之丙子詔臣庶名犯古帝王而姓復同者禁之周公孔子之名亦令回避戊寅升相州爲彰德府以前右副都點檢溫敦忠等為賀宋正旦使壬午尚書省奏知河南府事程嶧乞進封父祖權尚書禮部郎中

党懷英言凡宰執改除外任長官其佐官以下相見禮儀皆與他長官不同其子亦得試補省令史其子且爾父祖封贈理當不同合與宰執一例封贈從之甲申改提刑司令史為書史丙申以有司言河州定羌民張顯孝友力田焚券已責又獻粟千石以賑饑棣州民榮楫賑米七百石錢三百貫冬月散柴薪三千束皆別無希覬特各補兩官仍正班叙十二月癸卯以東上閣門使張汝猷為高麗生日使辛亥諭有司祈雪祭丑獵于近郊丙辰有赤氣見于北方丁巳勅華州下邽縣置武定鎮倉京兆櫟陽縣置粟邑鎮倉許州舞陽縣置北舞渡倉各設倉草都監一人縣官

兼領之乙丑定到任告致仕格丁卯宋高麗夏遣使來賀
正旦

本紀第九

本紀第十

金史十

開儀司在國錄軍國軍事前中書右丞相兼修國領經筵事都總裁臣脫脫奉

勅修

章宗二

四年春正月己巳朔以皇太后喪不受朝辛未以平章政
事夾谷清臣為尚書右丞相監修國史丁丑遣戶部侍郎
李獻可等分路勸農事癸未尚書省奏大興府推官蘇德
秀為禮部主事上曰朕既嘗語卿百官當使久於其職彼
方任理官復改戶曹尋又除禮部人才豈能兼之若久於
其職但中材勝於新人事既經練亦必有濟後不可輕易

改除上又言凡稱政有異迹者謂其斷事有軼才也若止清廉此乃本分以貪汙者多故顯其異耳宰臣又言近言事者謂方今孝弟廉恥道缺乞正風俗此蓋官吏不能奉宣教化使然今之察舉官吏者多責近效以幹辦爲上其有秉心寬厚欲行德化者輒謂之迂闊故人皆以教化爲餘事此孝弟所以廢也若諭所司官吏有能務行德化者擢而用之則教化可行孝弟可興矣今之所察舉皆先才而後德巧猾之徒雖有臧污一旦見用猶爲能吏此廉恥所以喪也若諭所司察舉官吏必審真僞使有才無行者不能覬覦非道求進者加之糾劾則奔競之俗息而廉

恥可興矣辛卯賑河北諸路被水災者癸巳諭點檢司行宮外地及圍獵之處悉與民耕雖禁地聽民持農器出入丙申東京路副使三勝進鷹遣諭之曰汝職非輕民間利害官吏邪正略不具聞而乃以鷹進此豈汝所職也後母復爾二月戊戌朔如春水始以春秋二仲月上戊日祭社稷癸丑獵于姚村淀癸亥至自春水丙寅參知政事張萬公罷三月戊辰朔諸路提刑司入見各問以職事仍誠諭曰朕特設提刑司本欲安民于今五年劾猶未著蓋多不識本職之體而徒事細碎以致州縣例皆畏縮而不敢行事廼者山東民艱于食嘗遣使賑濟蓋卿等不職故至於

此既往之失其思悛改庚午上將幸景明宮御史中丞董師中等上書切諫不報壬申章再上補闕許安仁拾遺路鐸皆諫廼止制定民習角觝撿棒罪以工部尚書胥持國爲參知政事丙子特賜有司孔端甫及第授小學教授尋以年老命食主簿半俸致事甲申幸香山永安寺及玉泉山甲午定配享功臣勅自今御史臺奏事修起居注並令回避夏四月丁酉朔幸興陵崇妃第是日始舉樂自己亥至癸卯百官三表請上尊號上曰祖宗古先有受尊號者蓋有其德故有其名比年五穀不登百姓流離正當戒懼修身之日豈得虛受榮名耶不許仍斷來章戊申親禘于

太廟庚戌如萬寧宮辛亥右丞相清臣率百官及耆艾等復請上尊號學官劉璣亦率六學諸生趙楷等七百九十五人詣紫宸門請上尊號如唐元和故事不許丁巳賑河州饑勅女直進士及第後仍試以騎射中選者升擢之乙丑減尚廩食穀馬五月丙寅朔曹王永升及諸王請上尊號不許以尚廩局使石抹貞爲橫賜夏國使己巳上以群臣累上尊號不受詔諭中外徒罪以下逆降一等杖以下原之甲戌觀稼于近郊辛巳諭左司徧諭諸路令月具雨澤田禾分數以聞癸未以久雨禁六月癸丑賜有司所舉德行才能之士安州崔秉仁兗州翟駒錦州齊文乙大名

孫可久陳信仁應州董歿並同進士出身丙辰以晴致祭
嶽鎮海瀆壬戌尚書右丞相夾谷清臣進封戴國公西京
留守完顏守貞為平章政事封蕭國公尚書右丞劉瑋薨
秋七月辛巳南京路提刑司自許州遷治南京己丑制三
品以上官有故者若親賢勲舊尚書省即與聞奏議加追
贈命以銀改鑄禮信之寶仍塗以金以同判大睦親府事
襄為樞密使以御史中丞董師中等為賀宋生日使八月
己亥樞密使襄帥百僚再請上尊號不許是日歲星太白
晝見庚子大赦甲辰至自萬寧宮丁未釋奠孔子廟北面
再拜辛亥國史院進世宗實錄上服袍帶御仁政殿降座

立受之九月甲子朔天壽節御大安殿受親王百官及宋
高麗夏使朝賀戊辰以叅知政事夾谷衡為尚書右丞戶
部尚書馬琪為叅知政事勅尚書省大定二十九年以後
士庶言事或係國家或邊關大利害已嘗施行者可特補
一官有益於官民量給以賞以西上閣門使大譽為夏國
生日使庚午如山陵次奉先縣辛未拜天于縣西壬申致
奠諸陵癸酉如秋山十一月庚午右丞相清臣叅知政事
持國上表丐閑優詔不許戊寅以翰林直學士完顏匡等
為賀宋正旦使命匡權易名弼以避宋諱壬午朱冰丙戌
詔諸職官以贓污不職被罪以廉能獲升者令隨路京府

州縣列其姓名揭之公署以示勸懲庚寅夏國嗣子李純
佑遣使來訃告十二月甲午朔夏國李純佑遣使奉故王
仁孝遺表以進諭大興府於暖湯院日給米五石以贍貧
者戊戌定武軍節度使鄭王永蹈以謀反誅已亥諭有
司以鄭王財產分賜諸王澤國公主財物分賜諸公主甲
辰諸王府增置司馬一人以紇石烈瑄爲高麗生日使西
上閣門使大畧等爲夏國勅祭慰問使庚戌尚書省以科
目近多得人乞是舉增取進士上然之詔有司會試毋限
人數甲寅冊長白山之神爲開天弘聖帝丙辰獵于近郊
是歲大有年邢洛深冀及河北十六謀克之地野蠶成繭

五年春正月癸亥朔宋高麗夏遣使來賀乙丑昭容李氏
進位淑妃己巳初用唐宋典禮皇后忌辰皆廢務尚書省
進區田法詔相其地宜務從民便又言遣官邵農之擾命
提刑司禁止之乙亥以葉魯谷神始製女直字詔加封贈
依倉頡立廟鑿屋例祠於上京納里渾莊歲時致祭令其
子孫拜奠本路官一人及本千戶春秋二祭辛巳前中都
路都轉運使王寂薦三舉終場人蔡州文商經明行修足
備顧問前河北西路轉運使李揚言慶陽府進士李獎純
德博學鄉曲譽之絳州李天棋應州康晉侯屢赴廷試皆
有才德上曰文商可令召之李獎給主簿半俸終身餘賜

同進士出身遣國子祭酒劉璣冊李純佑爲夏國王丁亥
幸城南別宮丁酉初定長吏勸課能否賞罰格尚書省奏
禮官言孝懿皇后祥除已久宜易隆慶宮爲東宮慈訓殿
爲承華殿從之詔購求崇文總目內所關書籍戊戌祭社
稷以宣獻皇后忌辰用熙寧祀儀樂縣而不作二月甲辰
鄆王琮薨己酉宰臣請罷北邊屯駐軍馬不允癸丑以齊
河縣民張消濟陽縣王琛河州李錡急義好施詔復之終
身仍著于令命宣徽使移刺敏戶部主事赤盞實理哥相
視北邊管屯經畫長久之計三月壬申初定限錢禁庚辰
初定日月風雨雷師常祀戊子置弘文院譯寫經書夏四

月壬辰朔幸北苑庚子詔各路所舉德行才能之士涿州
時琦雲中劉摯鄭州李升恩州傅礪濟南趙摯興中田扈
方六人並特賜同進士出身以文商爲國子教授特遷登
仕郎己酉詔自今筐檣床榻之飾毋以金玉壬子特賜翰
林待制溫迪罕迪翰林學士承旨中奉大夫乙卯幸景明
宮董師中賈守謙路鐸先後凡兩上封事切諫不報五月
庚午次烏十撒八戊子拒撫二州旱遣使禱于縉山六月
壬辰如冰井己亥出獵登胡土白山酌酒再拜曹王永升
以下進酒丙午拜天曲赦西北路己未如杏沙秋山是月
宋前主脊殂七月戊辰獵于豁赤火一發貫雙鹿是日獲

鹿二百二十二賜扈從官有差辛巳次魯溫合失不是日
上親射獲黃羊四百七十一乙酉次冰井丙戌以天壽節
宴樞光殿凡從官及承應人遇覃恩遷秩者並受宣勅於
殿前時久雨初霽有龍曳尾于殿前雲間戊子御膳羹中
有髮上舉視而棄之戒左右毋宣言八月辛亥至自景明
宮壬子何決陽武故堤灌封丘而東丁巳賜從幸山後親
軍銀絹有差九月戊午朔天壽節宋高麗夏遣使來賀壬
戌命增定捕盜官被殺贖錢及官賞格甲子都水監官王
汝嘉等坐河決各削官兩階杖七十罷之乙丑上御睿思
殿諸路提刑使入見戊辰初令民買撲隨處金銀銅冶命

參知政事馬琪往視河決仍許便宜從事壬申宋主遣使
來告哀戊寅以知大興府事尼兀古鑑等爲宋國弔祭使
勅尚書省集百官議備邊事壬午特推恩東宮舊人司經
王伯溫等八人官有差甲申命上京等九路并諸抹及紉
等處選軍三萬俟來春調發仍命諸路并北阻黻以六年
夏會兵臨潢冬十月庚寅右丞相夾谷清臣等表請上尊
號不允宋遣使獻遺留物壬寅右丞相清臣復請上尊號
國子祭酒劉璣亦率六學諸生上表陳請不允遣戶部員
外郎何格賑河決被災人戶庚戌張汝弼妻高陀幹以謀
逆伏誅壬子尚書省奏升提刑司所察廉官南皮縣令史

肅以下十有二人而大興主簿蒙括蠻都亦在選中上知其人曰蠻都澆浮人也升之可乎與其任澆浮孰若用淳厚况蠻都常才才智過人猶不當用恐敗風俗况常才耶其再察之閏月戊午朔宋主遣使來報即位甲子親王百官各奉表請上尊號不允丙寅以代國公歡都等五人配享世祖廟廷甲戌以河東南北提刑使王啓等爲賀宋主即位使乙亥獵于近郊戊寅上問輔臣孔子廟諸處何如平章政事守貞曰諸縣見議建立上因曰僧徒修飾宇像甚嚴道流次之惟儒者於孔子廟最爲滅裂守貞曰儒者不能長居學校非若僧道久處寺觀上曰僧道以佛老營利故務在莊嚴闕侈起人施利自多所以爲觀美也庚辰參知政事馬琪自行省回具奏河防利害語載琪傳中丙戌以翰林待制奧屯忠孝權戶部侍郎太府少監溫昉權工部侍郎行戶工部事修治河防以引進使完顏衷爲夏國生日使十一月癸巳詔罷紫荊嶺所護圍場庚子以右宣徽使移剌敏等爲賀宋正旦使癸丑太白晝見十二月辛酉平章政事完顏守貞罷以知大興府事尼庵古鑑爲參知政事以戶部郎中李敬義爲賜高麗生日使丁卯免被黃河水災今年秋稅辛巳勅減修內司備營造軍千人都城所五百人癸未勅尚書省自今獻靈芝嘉禾者賞

六年春正月丁亥朔受宋高麗夏使朝賀庚寅太白晝見
辛卯勅有司給天水郡公家屬田宅壬辰如春水庚戌罷
陝西括地辛亥諭胥持國河上役夫聚居恐生疾疫可廩
醫護視之乙卯次御林二月丁巳朔勅有司行宮側及獵
所有農者勿禁己未始祭高禩庚午至自春水丁丑京師
地震大雨雹晝晦震應天門右鷓尾癸未宋遣使來報謝
三月丙戌朔日有食之甲午以翰林直學士李昉魯子元
兼右司諫監察御史田仲禮爲左拾遺翰林修撰僕散訛
可兼右拾遺諭之曰國家設置諫官非取虛名蓋責實効
庶幾有所裨益卿等皆朝廷選擢置之諫職如國家利害

官吏邪正極言無隱近路鐸左遷本以他罪卿等勿以被
責遂畏縮不言其悉心戮力毋得緘默丙申如萬寧宮戊
戌以北邊糧運括群牧所三招討司猛安謀克隨亂及迭
刺唐古部諸抹西京太原官民馳五千充之惟民以馳載
爲業者勿括以銀五十萬兩錢二十三萬六千九百貫以
備支給銀五萬兩金盃二千八百兩金牌百兩銀盃八千
兩絹五萬匹雜絲千端衣四百四十六襲以備賞勞庚子
以郡舉才行之士翟介然以下三人特賜進士及第李真
固以下十五人同進士出身夏四月癸亥勅有司以增修
曲阜宣聖廟工畢賜衍聖公以下三獻法服及登歌樂一

部仍遣太常舊工徃教孔氏子弟以備祭禮甲子以尚書
左丞烏林荅愿爲平章政事右丞夾谷衡爲尚書左丞丙
子幸玉泉山戊寅以修河防工畢參知政事胥持國進官
二階翰林待制奧屯忠孝以下三十六人各一階獲嘉令
王維翰以下五十六人各賜銀幣有差庚辰以尚書右丞
相夾谷清臣爲左丞相監修國史封密國公樞密使裏爲
尚書右丞相封任國公參知政事胥持國爲尚書右丞壬
午賜宰臣手詔以風俗不淳官吏苟且責之五月丙戌命
減萬寧宮陳設九十四所辛卯以出師遣禮部尚書張暉
告于廟社乙未判平陽府事鎬王永中以罪賜死并及二
子丁酉詔中外乙巳詔諸路猛安謀克農隙講武本路提
刑司察其惰者罰之庚戌命左丞相夾谷清臣行省于臨
潢府六月丙辰右諫議大夫賈守謙右拾遺僕散訛可坐
鎬王永中事奏對不實削官二階罷之御史中丞孫即康
右補闕蒙括胡刺右拾遺田仲禮各罰金二十斤丙寅以
樞密副使唐括貢爲樞密使以久雨祭庚辰太白經天辛
巳左丞相清臣遣使來獻捷七月丙申幸曹王永升第甲
辰始定文武官六貫石以上承應人并及廕者若在籍儒
生章服制八月己未命兗州長官以曲阜新修廟告成于
宣聖癸亥至自萬寧宮己巳以溫敦伯英言命禮部令學

官講經辛未以吏部尚書吳鼎樞等為賀宋生日使壬申
行省都事獨吉來報捷乙亥勅官中承應人出職後
三年內犯贓罪者元舉官連坐不在去官之限著為令辛
巳木波進馬九月壬午朔天壽節宋高麗夏遣使來賀甲
申冊靜寧山神為鎮安公忽土白山神為瑞聖公丙戌知
河間府事移刺仲方為御史大夫辛卯如秋山以尚書左
司郎中粘割胡上為夏國生日使冬十月丙辰至自秋山
丁巳以歲辛春水秋山五日一進起居表自今可十日一
進乙亥命尚書左丞夾谷衡行省于撫州命選親軍武衛
軍各五百人以從仍給錢五十萬十一月戊子左丞相夾

谷清臣罷右丞相襄代領行省事丙申以刑部尚書紇石
烈貞等為賀宋正旦使壬寅初定猛安謀克鎮邊後放免
者授官格禁射糧軍應役但成隊伍不得持兵器及凡可
以傷人者甲辰報敗敵於望雲乙巳以樞密使唐括貢御
史大夫移刺仲方禮部尚書張暉等二十三人充計議官
凡軍事則議之戊申初定縣官增水田陞除制十二月乙
卯詔招撫北邊軍民以知登聞檢院賈益為高麗生日使
戶部員外郎納蘭昉為橫賜使戊午禮部尚書張暉等進
大金儀禮丁卯應奉翰林文字趙秉文上書論姦欺乙亥
詔加五鎮四瀆王爵庚辰上幸後園閱軍器是月右丞相

襄率駙馬都尉僕散揆等進軍大鹽灤分兵攻取諸營
承安元年春正月辛巳朔受宋高麗夏使朝賀甲申大鹽
灤群牧使移刺覲等爲廣告刺部兵所敗死之丁亥國子
學齋長張守愚上平邊議三篇特授本學教授仍以其議
付史館二月甲子命有司祀高禩如新儀丁卯右丞相襄
左丞衡至自軍前己巳復命還軍幸都南行宮春水甲戌
至自行宮是月初造虎符發兵三月丁酉如萬寧宮不雨
遣官望祭嶽鎮海瀆于北郊癸卯勅尚書省刑獄雖已奏
行其間恐有疑枉其再議以聞人命至重不可不慎也甲
辰遣參知政事尼兀古鑑祈雨于社稷丁未復遣使就祈

于東嶽夏四月辛亥命尚書右丞胥持國祈雨于太廟壬
子遣使審決冤獄京城禁織扇戊午初行區種法民十五
以上六十以下有土田者丁種一畝乙丑命御史大夫移
刺仲方祈雨于社稷壬申命參知政事馬琪祈雨于太廟
甲戌尚書省以趙承元言請追上孝懿皇太后冊寶然後
行謚冊禮禮官執奏尊皇太后已詔示中外無追冊禮從
之戊寅上以久不雨命禮部尚書張暉祈于北嶽己卯遣
官望祭嶽鎮海瀆于北郊五月庚辰朔觀稼于近郊因閱
區田乙酉以久旱徙市庚寅詔復市如常壬辰以尚藥局
副使粘割忠爲橫賜夏國使乙未參知政事尼兀古鑑薨

庚子雨足六月甲寅上以百姓艱食詔出倉粟十萬石減價以糶之乙丑平晉縣民利通家蠶自成綿段長七尺一寸五分濶四尺九寸詔賜絹十疋丁卯勅自今長老大師大德不限年甲長老大師許度弟子三人大德二人戒僧年四十以上者度一人其大定十五年附籍沙彌年六十以上並令受戒仍不許度弟子尼道士女冠亦如之御史大夫穆刺仲方罷庚午幸環秀亭觀稼癸酉詔應禁軍器路多步弓手擬於射糧軍內選之馬弓手擬於猛安謀克軍戶餘丁內選之其有爲百姓害從本州縣斷遣無猛安戶於二百里內屯駐軍餘丁內取之依步弓手月給二貫

石七月庚辰御紫宸殿受諸王百官賀賜諸王宰執酒勅有司以酒萬尊置通衢賜民縱飲乙酉勅今後高麗夏使入見敷奏令新設各國通事具公服與閣門使上殿監聽命有司收瘞西北路陣亡骸骨八月己酉獵于近郊癸丑幸玉泉山甲子以郊祀日期詔中外戊辰至自萬寧宮以陝西西路轉運使董師中爲御史大夫癸酉左丞衡丁父憂九月丁丑朔天壽節宋高麗夏遣使來賀幸天長觀辛巳以右丞相襄爲左丞相監修國史封常山郡王壬午賜襄酒百尊太白晝見癸未都人進酒三千一百瓶詔以賜北邊軍吏以吏部尚書張嗣等爲賀宋生日使癸巳左丞

衡起復丁酉知大興府卞同知郭鑄以擅逮問宰臣各答
四十辛丑西南路招討使僕散揆至自軍乙巳以國子監
丞烏古論達吉不爲夏國生日使冬十月丙午朔詔選親
軍八百人戊撫州庚戌命左丞相襄行省于北京簽書樞
密院事完顏匡行院於撫州丙辰裕享于太廟十一月戊
子參知政事馬琪罷庚寅特滿郡牧契丹陁鎖德壽反泰
州軍擊敗之御史大夫董師中北京留守裔並爲參知政
事甲午以陝西路統軍使崇道等爲賀宋正旦使丁酉朝
享于太廟戊戌有事于南郊大赦改元己亥曹王永升率
親王百官賀癸卯命有司祈雪仍遣官祈于東嶽十二月
丙午樞密使唐括貢率百官請上尊號不允己酉遣提點
太醫近侍局使李仁惠勞賜北邊將士授官者萬一千人
授賞者幾二萬人凡用銀二十萬兩絹五萬疋錢三十二
萬貫庚戌以同知登聞檢院阿不罕德剛爲高麗國生日
使壬子樞密使唐括貢復率百官請上尊號不允
二年春正月乙亥朔宋高麗夏遣使來賀乙酉勅職官犯
贓私不得訴于同官丁亥如安州春水丁酉至自春水辛
丑宋主以母后喪遣使告哀二月丁巳勅自今職官犯贓
每削一官殿一年是日太白晝見經天是月特命襲封衍
聖公孔元措世襲兼曲阜令三月己卯親王百官復請上

尊號不允壬午命尚書戶部侍郎溫昉佩金符行六部尚書於撫州庚寅幸西園閱軍器辛卯始定保舉德行才能格癸巳平章政事烏林荅愿罷丁酉樞密使唐括貢率百官請上尊號不允以參知政事裔代左丞省襄行省于北京夏四月甲寅如萬寧宮丙辰命有司祈雨望祭嶽鎮海瀆于北郊甲子祈雨于社稷尚書省奏比歲北邊調度頗多請降僧道空名度牒紫褐師德號以助軍儲從之癸酉親王宣勅始用女直字五月甲戌朔諭宰臣曰比以軍須隨路賦調司縣不度緩急促期徵歛使民費及數倍胥克又乘之以侵暴其令提刑司究察之丙子集官吏于尚書

省詔諭之曰今紀綱不立官吏弛慢遷延苟簡習以成弊職官多以吉善求名計得自安國家何賴焉至於徇情賣法省部令史尤甚尚書省其戒諭之丁丑北京行省參知政事裔移駐臨潢府庚辰升撫州爲鎮寧軍以雨足報祭于社稷甲申望祭嶽鎮海瀆于北郊丁亥左丞相襄詣臨潢府己丑皇子生庚寅詔中外降死罪釋徒以下六月乙巳命禮部尚書張暉報祀高禩丙午雨雹戊申以澄州刺史王遵古爲翰林直學士仍勅無與撰述入直則奏聞或霖雨免入直以遵古年老且嘗侍講讀也庚戌詔罷瑤光殿工作甲寅置全州盤安軍節度使治安豐縣乙卯封皇

子爲壽壬閏月甲午出西橫門觀稼秋七月壬寅朔幸天
長觀建普天大醮禁屠宰七日無奏刑百司權停決罰已
未命西上閣門使劉頰賜參知政事裔宴于行省戊辰天
壽節御紫宸殿受朝八月庚辰勅計議官所進奏帖可直
言利害勿用浮辭辛巳以邊事未寧詔集六品以上官於
尚書省問攻守之計應中外臣僚不以職位高下或有方
略材武或長於調度各舉三五人以備選用無有顧望不
盡所懷期五日封章以進議者凡八十四人言攻者五守
者四十六且攻且守者三十三召對睿思殿論難久之癸
未至自萬寧宮丙戌以左丞相襄爲左副元帥參知政事

董師中尚書左丞左宣徽使曾尚書右丞戶部尚書楊伯
通參知政事尚書左丞夾谷衡罷右丞胥持國致仕庚寅
參知政事裔罷樞密使唐括貢致仕壬辰以左副元帥襄
爲樞密使兼平章政事九月辛丑朔天壽節宋高麗夏遣
使來賀壬寅遣官分詣上京東京北京咸平臨潢西京等
路招募漢軍不足則簽補之乙巳以夏使朝辭詔荅許復
保安蘭州權塲丁未以知歸德府事完顏愈爲賀宋生日
使癸丑以上京留守粘割訛特刺爲平章政事辛酉以樞
密使兼平章政事襄知大興府事胥持國爲樞密副使權
參知政事行省于北京乙丑始置軍器監掌治戎器班少

府監下設甲坊利器二署隸焉丁卯分遣官於東西北路
河北等路中都二節鎮買牛五萬頭冬十月庚午朔初設
講議所官十員共議錢穀以中都路轉運使孫鐸戶部侍
郎高汝礪等爲之庚辰尚書省奏高麗國牒報其王以老
疾令母弟暉權國事壬午尚書省行推排丁亥皇子壽王
薨壬辰詔獎諭西南路招討使僕散揆等有功將士甲午
大雪以米千石賜普濟院今爲粥以食貧民丙申以禮部
員外郎蒙括仁本爲夏國生日使十一月甲辰冬至有事
于南郊乙巳以薪貴勅圍場地內無禁樵採壬子諭尚書
省猛安謀克既不隸提刑司宜令監察御史察其臧否庚
申北京留守裔以行省失職杖一百除名右諫議大夫納
蘭昉杖九十削官二階罷之甲子諭宰臣曰朕居九重民
間難以徧知宰相不見賓客何以得知民間利害十二月
己巳朔勅御史臺糾察詔佞趨走有實跡者己卯始鑄承
安寶貨癸未遣戶部侍郎上官瑜體究西京逃亡勸率沿
邊軍民耕種戶部郎中李敬義規措臨潢等路農務乙酉
諭宰臣今後水潦旱蝗盜賊竊發命提刑司預爲規畫戊
子諭西南路將士庚寅豫王永成進馬八十疋賜詔獎諭
稱皇叔豫王而不名

本紀第十

本紀第十一

金史十一

開府儀同三司在國錄軍國重事前書丞相監修 國史領 經筵事都總裁 脫脫奉

勅修

章宗三

三年春正月己亥朔日有食之辛丑宋夏遣使來賀癸卯諭有司凡館接伴并奉使者毋以語言相勝務存大體奉使者亦必得其人乃可乙卯詔罷講議所丙辰如城南春水丁巳併上京東京兩路提刑司為一提刑使副兼安撫使副安撫專掌教習武事毋令改其本俗己未以都南行宮名建春甲子至自春水乙丑宋主以祖無喪遣使告哀

二月己巳朔建春宮辛巳諭宰臣曰今內外官有關
有才能可任者雖資歷未及亦具以聞雖親故母有所避
以武衛軍都指揮使烏林荅天益等爲宋弔祭使甲申至
自建春宮丙戌斜出內附辛卯平章政事粘割斡特刺薨
三月戊戌以禮部尚書張暉爲御史大夫壬寅始榷醋甲
寅如萬寧宮丁巳勅隨處盜賊毋以強爲竊以多爲少以
有爲無嘯聚三十人以上奏聞違者杖百丙寅高麗王王
昭以弟暉權國事遣使奉表來告夏四月戊辰朔諭有司
宰相遇雨可循殿廡出入丙申諭御史臺曰隨朝大小官
雖有才能率多苟簡朕甚惡之其察舉以聞提刑司所察

廉能汙濫官皆當殿奏餘事可轉以聞以侍御史孫俱爲
宣問高麗王王昭使庚子右宣徽使張汝方以漏泄廷議
削官兩階五月壬寅射柳擊毬縱百姓觀戊申以客省使
移刺郁爲夏國生日使甲子參知政事楊伯通表乞致仕
不許秋七月丙午幸香山己酉如萬寧宮甲寅還宮八月
辛未獵于近郊癸酉獵于香山戊寅如萬寧宮庚辰以護
衛石和尚爲押軍萬戶率親軍八百人武衛軍千六百人
戍西北路癸未還宮宋遣使來報謝九月丙申朔天壽節
宋夏遣使來賀以中都路都轉運使孫鐸等爲賀宋生日
使乙巳獵于近郊庚戌參知政事楊伯通再表乞致政不

許戊午木波進馬冬十月庚午獵于近郊癸未行樞密院
言斜出等請開推場於轄里裊從之丁亥定官民存留見
錢之數設回易務更立行用鈔法十一月丁酉樞密使兼
平章政事襄至自軍癸卯以爲尚書左丞相監修國史丁
未以太常卿楊庭筠等爲賀宋正旦使戊申詔獎諭樞密
副使夾谷衡以下將士辛亥定屬託法定軍前官吏遷賞
格以邊事定詔中外減死罪徒已下釋之賜左丞相襄以
下將士金幣有差甲寅冬獵十二月甲子朔獵于酸棗林
大風寒罷獵凍死者五百餘人已巳還都丙戌尚書右丞
膏罷高麗權國事王暉遣使奉表來告

四年春正月癸巳朔宋夏遣使來賀乙巳尚書左丞董師
中致仕辛酉監察御史姬端脩以妄言下吏尚書左丞相
襄爲司空職如故樞密副使夾谷衡爲平章政事封英國
公前知濟南府事張萬公起復爲平章政事封壽國公楊
伯通爲尚書左丞簽樞密院事完顏匡爲尚書右丞二月
乙丑如建春宮春水已巳還宮庚午御宣華門觀迎佛辛
未如建春宮赦姬端脩罪令居家俟命司空襄言西南路
招討使僕散揆治邊有功召赴闕以知興中府事紇石烈
子仁代之壬申諭有司自三月一日爲始每旬三品至五
品官各一人轉對六品亦以次對臺諫勿與有應奏事與

轉對官相見無面對者上章亦聽乙亥還宮戊寅如建春
宮庚辰上諭點檢司曰自蒲河至長河及細河以東朕常
所經行官為和買其地令百姓畊之仍免其租稅甲申還
宮乙酉以西南路招討使僕散揆為參知政事起姬端脩為
太學博士如建春宮戊子還宮三月丁酉同判大睦親府
事宗浩為樞密使封崇國公己亥如建春宮遣使冊王暉
為高麗國王戶部尚書孫鐸郎中李仲略國子祭酒趙忱
始轉對香閣丁未勅尚書官負必須改除者議之其月日
淺者毋數改易乙卯尚書省奏減親軍武衛軍額及太學
女直漢兒生負罷小學官及外路教授詔學校仍舊武衛

軍額再議餘報可司空襄右丞匡參知政事揆請罷諸路
提點刑獄從之戊午雨雹夏四月癸亥改提刑司為按察
使司戊辰如萬寧宮壬申左丞楊伯通致仕御史大夫張
暉以奏事不實追一官侍御史路鐸追兩官俱罷之姬端
脩杖七十贖壬午英王從憲進封瀛王詔同州許州節度
使罷兼陝西河南副統軍五月壬辰朔以旱下詔責躬求
直言避正殿減膳審理冤獄命奏事於泰和殿戊戌命有
司望祭嶽瀆禱雨己亥應奉翰林文字陳載言四事其一
邊民苦于寇掠其二農民困于軍須其三審決冤滯一切
從寬苟縱有罪其四行省官負例獲厚賞而沿邊司縣曾

不霑及此亦干和氣致旱災之所由也上是之壬寅以兵部郎中完顏撒里合爲夏國生日使戊申宰臣以京畿雨率百官請御正殿復常膳不從尚書省奏上更定給發虎符制著于令庚戌諭宰臣曰諸路旱或關執政今惟大興宛平兩縣不雨得非其守令之過歟司空襄平章政事萬公參知政事揆上表待罪上以罪已荅之令各還職詔頒銅杖式壬子祈雨于太廟乙卯更定軍功賞格戊午司空襄以下再請御正殿復常膳不從庚申平章政事夾谷衡薨以宿直將軍徒單仲華爲橫賜夏國使六月丁卯雨司空襄以下復表請御正殿復常膳從之甲戌以雨足命有

司報謝于太廟丁丑右補闕楊庭秀言自轉對官外復令隨朝八品以上外路五品以上及出使外路有可言者並許移檢院以聞則時政得失民間利病可周知矣從之己卯以雨足報祭社稷辛巳遣官報祀嶽瀆癸未奉職醜和尚進浮漏水稱影儀簡儀圖命有司依式造之丁亥定宮中親戚非公事傳達語言轉遞諸物及書簡出入者罪七月甲辰更定尚藥儀鸞局學者格辛亥勅宣徽院官天壽節凡致仕宰執悉召與宴丙辰以久雨令大興府祈晴八月己巳獵于近郊壬申獵于香山甲戌以皇嗣未立命有司祈于太廟丁丑獵于近郊庚辰還宮九月庚寅朔天壽

節宋高麗夏遣使來賀己亥如薊州秋山己未以知東平
府事僕散琦等為賀宋生日使冬十月丙寅至自秋山壬
午初定百官休假甲申初置審官院乙未勅京府州縣設
普濟院每歲十月至明年四月設粥以食貧民丙申平章
政事張萬公表乞致政不許庚戌命有司祈雪十一月甲
寅定護衛改充奉御格以知濟南府事范楫等為賀宋正
早使十二月己未除授文字初送審官院辛酉更定考試
隨朝檢知法條格右補闕楊庭秀請類集太祖太宗世宗
三朝聖訓以時觀覽從之仍詔增熙宗為四朝癸未更定
科舉法增設國史院女直漢人同脩史各一人定親軍及

承應人退閑遷賞格是月淑妃李氏進封元妃
五年春正月戊子朔宋高麗夏遣使來賀乙未以尚書省
言會試取策論詞賦經義不得過六百人合格者不及其
數則闕之丙申如春水庚子命左右司五日一轉奏事辛
丑諭點檢司車駕所至仍令百姓市易庚戌定猛安謀克
軍前怠慢罷世襲制二月辛未至自春水辛巳有司奏應
奉翰林文字溫迪罕天興與其兄直學士思齊同僚學士
院定撰制誥文字合無迴避詔不須避仍為定制癸卯定
進納粟補官之家存留弓箭制丁未上與宰臣論置相曰
徒單鎰朕志先定賈鉉如何皆曰知延安府事孫即康可

平章政事萬公亦曰即康及第先鉉一榜上曰至此安問
榜次特以賈才可用耳尚書省奏右補闕楊庭秀言乞令
尚書省及第左右官一人應入史事者編次日曆或一月
或一季封送史院上是其言仍令送著作局潤色付之三
月庚申大睦親府進重脩玉牒平章政事張萬公乞致政
不許壬戌命有司禱雨癸亥兩戶部尚書孫鐸大理卿完
顏撒剌國子司業蒙括仁本召對便殿丙寅如萬寧宮戊
辰定妻亡服內婚娶聽離制親王宰執百官再請上尊號
不許庚午以知大興府事十爲御史大夫丙子尚書省奏
擬同知商州事蒲察西京爲濟南府判官上曰宰相豈可

止徇人情要當重惜名爵此人不堪朕常記之止與七品
足矣庚辰以上京留守徒單鎰爲平章政事封濟國公辛
巳定本國婚聘禮制改山東東路舊皇城猛安名曰合里
哥阿隣四月丙戌朔文武百官再請上尊號不許丙午尚
書省進律義五月乙卯朔定猛安謀克鬪歐殺人遇赦免
死罷世襲制以兩足遣使報祭社稷丁巳定策論進士及
承廕人試弓箭格戊午勅來日重玉拜天服公裳者拜禮
仍舊諸便服者並用女直拜巳勅諸路按察司糾察親民
官以大杖箠人者乙亥親王文武百官六學各上表請上
尊號不許庚辰地震詔定進納官有犯決斷法六月乙巳

遣有司祈晴望祭嶽瀆七月乙卯朔以晴遣官望祭嶽鎮
海瀆癸亥定居祖父母喪婚娶聽離法初置蒲思衍羣牧
辛未平章政事萬公特賜告兩月甲戌獵于近郊八月壬
辰幸香山乙未至自香山丁未勅審官院奏事其院官皆
許升殿戊申更定鎮防軍犯徒配役法九月甲寅朔天壽
節宋高麗遣使來賀戊午命樞密使宗浩禮部尚書賈鉉
佩金符行省山東等路括地己未尚書省奏西北路招討
使獨吉思忠言各路邊堡墻隍西自垣舌東至胡烈么幾
六百里向以起築忽遽並無女墻副隄近令修完計工七
十五萬止役戍軍未嘗動民今已畢功上賜詔獎諭修玉

牒成定皇族收養異姓男爲子者徒三年姓同者減二等
立嫡違法者徒一年癸亥如薊州秋山冬十月庚寅至自
秋山庚子風霾宋遣使來告哀辛丑集百官于尚書省問
間者亢旱近則久陰豈政有錯謬而致然歟各以所見對
以禮部郎中劉公憲爲高麗生日使丁未獵于近郊以宿
直將軍完顏觀音奴爲夏國生日使十一月癸丑朔日有
食之乙卯以國史院編修官呂卿雲爲左補闕兼應奉翰
林文字審官院以資淺駁奏上諭之曰明昌間卿雲嘗上
書言宮掖事辭甚切直皆他人不能言者卿輩蓋不知也
臣下言事不令外人知乃是謹密正當顯用卿宜悉之以

工部尚書烏古論該等為宋帛祭使初定品官過闕則下制已巳宋復遣使來告哀辛未以殿前右副點檢紇石烈忠定為賀宋正旦使十二月癸未朔詔改明年為泰和元年以河南路統軍使充等為宋帛祭使乙未定管軍官受所部財物輒放離役及令人代役法辛丑詔宮籍監戶百姓自願以女為婚者聽癸卯定造作不如法三年內有損壞者罪有差泰和元年正月壬子朔宋高麗夏遣使來賀壬戌宋遣使獻先帝遺留物已巳以太府監孫復言方今在仕者三萬七千餘買而門廕補叙居三之二諸司待闕動至累年蓋以補廕猥多流品混淆本未相舛至於進納

之人既無勞績又非科第而亦廕及子孫無所分別欲流之清必澄其源乃更定廕叙法而頒行之尚書省奏今杖式輕細民不知畏請用大杖詔不許過五分庚午如長春宮春水辛未上以方春禁殺含胎兔犯者罪之告者賞之甲戌初命文武官官職俱至三品者許贈其祖二月壬辰去造土茶律丁未至自春水三月乙丑夏國遣使來謝壬申幸天長觀癸酉如萬寧宮乙亥宋遣使來報謝丁丑更定鎮防千戶謀克放老入除格辛己勅官司私文字避始祖以下廟諱小字犯者論如律夏四月甲辰詔諭契丹人戶累經簽軍立功者官賞恩例與女直人同仍許養馬為

吏五月甲寅擊球于臨武殿令都民縱觀丙辰樞密使宗
浩罷壬戌辛王泉山戊寅削尊長有罪卑幼追捕律以直
東上閤門劉頰為橫賜高麗使六月己卯幸香山乙酉平
章政事張萬公表乞致仕不許辛卯祈雨于北郊己亥用
尚書省言申明舊制猛安謀克戶每田四十畝樹桑一畝
毀樹木者有禁鬻地土者有刑其田多汙萊人戶闕乏并
坐所臨長吏按察司以時勸督有故慢者量決罰之仍減
牛頭稅三之一勅尚書省舉行風俗奢僭之禁乙巳初許
諸科徵鋪馬黃河夫軍須等錢折納銀一半願納錢鈔者
聽丁未詔有司修蓮花漏七月辛酉禁放良人不得應諸

科舉子孫不在禁限甲子諭刑部官凡上書人言及宰相
者不得申省乙丑更定右選注縣令丞簿格己巳初禁廟
諱同音字八月庚辰初命戶絕者田宅以三分之一付其
女及女孫戊子特改授司空襄河間府路筭注海世襲猛
安乙未至自萬寧宮丙申宋遣使來報謝壬寅制猛安謀
克並隸按察司監察御史止按部糾舉有罪則併坐監臨
之官詔推排西北京遼東三路人戶物力九月戊申朔天
壽節宋高麗夏遣使來賀更定贍學養士法生員給民佃
官田人六十畝歲支粟三十石國子生人百八畝歲給以
所入官為掌其數以右宣徽使徒單懷忠等為賀宋生日

使甲寅如秋山丙子至自秋山冬十月乙酉祫享于太廟
戊子平章政事張萬公乞致仕不許壬辰御史臺奏在制
按察司官比任終遣官考覈然後尚書省命官覆察之今
監察御史添設員多宜分路巡行每路女直漢人各一人
同往從之仍勅分四路丙申御史大夫卞乞致仕不許戊
戌以武衛軍都指揮使司判官納合鉉為高麗生日使壬
寅勅有司購遺書宜尚其價以廣搜訪藏書之家有珍惜
不願送官者官為騰寫畢復還之仍量給其直之半甲辰
以刑部員外郎完顏綱為夏國生日使十一月庚戌司空
襄以下文武百官復請上尊號不許辛亥勅尚書省凡役

衆勞民之事勿輕行之丁巳諭工部曰比聞懷州有橙結
實官吏檢視已嘗擾民今復進柑得無重擾民乎其誠所
司遇有則進無則已庚申以殿前右衛將軍統石烈七斤
等為賀宋正旦使十二月辛巳勅改原廟春秋祭祀稱朝
獻司空襄以下復請上尊號詔不允仍斷來章丁酉司空
襄等進新定律令勅條格式五十二卷辛丑詔頒行之壬
寅獵于近郊乙巳初定廉能官升注格

二年春正月丁未朔宋高麗夏遣使來賀乙卯始朝獻于
衍慶宮庚申幸芳苑觀燈癸酉歸德軍節度副使韓琛以
強市民布帛一官罷之甲戌如建春宮二月戊戌初置

內侍寄祿官乙巳還宮三月甲寅初置宮苑司都同監各
一人甲子蔡王從彝母克等大師卒詔有司定喪禮葬儀
事載從彝傳四月庚辰幸昇國長公主第問疾己亥定還
三品官格復撲買河灤法辛丑諭御史臺諸訴事于臺當
以實上聞不得輒稱察知癸卯如萬寧宮命有司祈雨五
月甲辰朔日有食之戊申如泰和宮辛亥初薦新于太廟
壬戌諭有司曰金井捺鉢不過二三日留朕之所止一涼
廈足矣苦加修治徒費人力其藩籬不急之處用圍幕可
也甲子更泰和宮曰慶寧長樂川曰雲龍己巳勅御史臺
京師拜廟及巡幸所過州縣止令洒掃不得以黃土覆道

違者糾之六月辛卯諭尚書省諸路禾稼及雨多寡令州
郡以聞七月辛亥有司奏還宮日請用黃麾仗不許乙卯
朝獻于街慶宮八月丙申鳳凰見于磁州武安縣鼓山石
聖臺丁酉還宮皇子生九月壬寅朔天壽節宋高麗夏遣
使來賀甲寅以拱衛直都指揮使完顏瑋等為賀宋生日
使直戒之曰兩國和好久矣不宜爭細故傷大體癸亥以
皇子生親謝南北郊庚午封皇子為葛王冬十月戊寅報
謝于太廟及山陵甲申以鳳凰見詔中外丙戌獵近郊壬
辰遣尚輦局副使李仲元為高麗國生日使以宿直將軍
紇石烈毅為夏國生日使瀛王府司馬獨吉溫為橫賜使

十一月甲辰更定德運爲土臘用辰以西京留守宗浩爲樞密使戊申以更定德運詔中外庚申初命外官三品到任進表稱謝甲子辛丑遣使報謝于太清宮十二月癸酉以皇子晬日放僧道戒牒三千以武安軍節度使徒單公弼等爲賀宋正旦使戊寅冬獵庚辰報謝于高禱丁酉還都閏月庚戌司空襄慶癸丑初命監察御史非特旨不許舉官辛酉遣使報謝于北嶽定人戶物力隨時推收法丁卯遣使報謝于長白山冬無雪

二年春正月辛未朔宋高麗夏遣使來賀癸酉遣官祈雪于北嶽丁丑朝獻于衍慶宮己卯以樞密使宗浩爲尚書

右丞相右丞完顏匡爲左丞參知政事僕散揆爲右丞御史中丞孫卽康刑部尚書賈鉉並爲參知政事庚辰如建春宮二月癸丑還宮甲子定諸職官省親拜墓給假例三月壬申朔平章政事張萬公致仕庚辰如萬寧宮丁亥定從人銅牌賣毀罪賞制庚寅定職官應遷三品格刺史以上及朝資歷在刺史以上身故者每半年一次敷奏甲午如玉泉山丙申以殿前都點檢僕散端爲御史大夫四月乙巳掃于太廟勅點檢司致仕官入宮年高艱于步履者並聽策杖仍令舍人護衛扶之丁巳勅有司祈雨仍頒土龍法己未命吏部侍郎李炳國子司業蒙括仁本登聞檢

院喬宇等再詳定儀禮庚申諭省司宮中所用物如民間
難得勿強市之癸亥尚書省奏遣官分路覆實御史所察
事五月壬午以重五拜天射柳上三發三中四品以上官
侍宴魚藻殿以天氣方暑命兵士甲者釋之丙戌以定律
令正土德鳳凰來皇嗣建大赦辛卯皇子葛王薨壬辰定
擅增減宮門鎖鑰罪丙申作太極宮六月己亥太白晝見
壬寅詔選聰明方正之士為修起居注又詰點檢司諸親
軍所設教授及授業人若干其為教何法通大義者幾人
各具以聞戊申定職官追贈法惟嘗犯賊罪者不在追贈
之列壬戌遣官行視中都田禾兩澤分數七月壬申朝獻

于衍慶宮乙亥定大臣薨百官奉慰禮庚辰獵于近郊丁
亥上諭宰臣凡奏事朕欲徐思或如已者若除被事可竣
三五日再奏餘並二十日奏之八月丙辰還宮庚申命編
修官左容充宮教賜銀幣九月丙寅朔天壽節宋高麗夏
遣使來賀壬申以刑部尚書承暉等為賀宋生日使戊子
以萬寧宮提舉司隸工部壬辰詔定千戶謀克受隨處捕
盜官公移盜急不即以眾應之者罪有差召右丞相宗浩
還朝冬十月戊戌日將暮赤如赭己亥大風甲辰申酉間
天大赤夜將旦亦如之壬子右丞僕散揆至自北邊丙辰
召王香閣慰勞之以尚食局使師孝為高麗生日使庚申

尚書左丞完顏匡等進世宗實錄上降座立受之壬戌以
薊州刺史完顏太平爲夏國生日使奉御完顏阿魯帶以
使宋還言宋權臣韓侂胄市馬厲兵將謀北侵上怒以爲
生事皆之五十出爲彰德府判官及淮平陷乃擢爲安國
軍節度副使丁卯諭尚書省士庶陳言皆從所司以聞自
今可悉令詣闕量與食直仍給官舍居之其言切直及繫
利害重者並三日內奏聞十一月辛未以簽樞密院事獨
吉思忠等爲賀宋正旦使丁丑冬獵以獲兔薦山陵甲午
詔監察等察事可二年一出十二月庚子諭宰臣曰賀正
宋使且至可令監察隨之以爲常壬寅還都已酉賜天長

觀額爲太極宮辛亥詔諸親王公主每歲寒食十月朔聽
朝謁興裕二陵忌辰亦如之癸丑詔遣監察御史分按諸
路所遣者女直人即以漢人朝臣偕所遣者漢人即以女
直朝臣偕戊午勅行宮名曰光春其朝殿曰蘭阜寢殿曰
輝寧

本紀第十一



